



### «Mir hänn dr Lengscht»

Wältmaischterlig isch d Laischtig, wo mir Schwiizer do hänn gschaft.  
Wie men e Dunnel baut, so lang und schön, hänn mir scho lang grafft.  
En Yysebaan Dunnel quer dur dr Gotthard, s Resultaat kaa sich bligge loo.  
Dr Lengscht vo dr Wält? Je nach däm wie me misst isch das au e soo.  
By dr Mässthechnigg isch me sich nit ainig, villicht wird dr Rekoord annulliert.  
Sin aber überzüügt, mir hänn garantiert dr Lengscht, egaal was gsait wird.  
Obwool mir jetzt dr Lengscht hän, e klaine Weemuetsdropfe beklaaage mir au.  
Bi dr Jumpferefaart het dr erschti Zug denn unsglööst, e riise Gau.

Nid nur für d Yysebaan hets e nöie Dunnel, nai au für d Auti goots loos.  
Me het abgstimmt und baut glyy none zwaite Dunnel für d Autistrooss.  
So gseet dr Gotthard bald nümme us, wien e Bärg, das isch wirklig jääs.  
Sondern e Felse mit ganz viil Löcher drin, soo wien e Schwiizerkääs.  
Mir Schwiizer sin die Beschte im Dunnel baue und diens dr Wält bewyyse.  
Immer lengeri und gröösseri Dunnel wänn mir baue, so lutet d Deviiise.  
S isch s klaine oder eebe au s groosse Beibi vo dr Doris Leuthard.  
D Schnuure vo ihre isch fascht so grooss, wie dr nöi Dunnel im Gotthard.

So kunts, dass syt em letschte Joor d Züüg dien duure Gotthard rattere.  
E Mänge doo und döört über dä grandioosi Dunnelbau duet schnattere.  
Uf d Lengi kunts zwar nit immer druff aa, in däm Fall aber absolut klaar.  
Unter de Dunnel isch unsere Gotthard Basis mittlerwyyle e richtige Staar.  
Dass me mit ebbisem ganz langem e groossi Ufmerksamkait ka bikoo.  
In dr Wält, als klaini Schwiiz, blötzig e Thema isch. S isch aifach e soo.  
Au wenss überall im Momänt drunter und drüber goot, mir findes famoos.  
Und fröie uns über Sache, wie dr lengscht Yysebaan Dunnel – grandioos.

E grosse Batze het dä Bau koschtet und wird in Zukunft no verschluggt.  
Mir baue all die Gotthard Dunnel vorallem für dr Dransit - s isch verruggt.  
Die Dunnel hän aber au seer viil Vortail s isch für uns e grosse Hit.  
Hoffentlig faare mit dr nöie Gotthard Streggi au ganz viili Schwoobe mit.  
S isch doch dr Hammer: Soo schnäll, wie sii in d Schwiiz sind koo,  
könne sii jetzt umso rascher in Chiasso wider uuse, do sin mir alli froo.  
E wytere Voordail seen mir aber troztdäm by all dene Uffwänd und Koschte.  
Unseri Fraue könne jetzt statt in Weil schnäll nach Mailand go Boschte.

Mit Nord, Süd und ganz Europa vernetzt. Muesch luege s isch nit zum Lache.  
Bekunsch jetzt in Norwääge s ganz Joor italiänischi Ärdbeeri - nit ganz bache  
Hüt muess alles immer schnäller goo, günschtig und effizianter syy.  
Spannend: Dr Bau vom Dunnel isch ainiges schnäller als d Blaanig gsyy.  
Do stellt sich für uns doch wirklig d Froog, wie me in Bärn duet schaffe.  
Viil drum umme schnuure statt emol Neegel mit Köpf mache - die Affe.  
Trotz allem mache mirs dr ganze Wält voor, wie me viili langi Dunnel baut.  
Wenss dä Gotthard vo luter bohre denn doch nit no uf d Schnuure haut.

E schööni Fasnacht.

[www.escargots-fratze.ch](http://www.escargots-fratze.ch)